



MONATA GAZETO DE E-HANDIKAPULOJ

INFORMILO 11

NOVEMBRO 2014

Kol. 355/30

XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX

**Enhavo: ILEI, 99-UK, D-ra disertacio, Domo de pensiuloj,
SAT-kongres, D-ro Schulhof**

XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX

La 47-a ILEI-Konferenco en Montevideo 19a - 25a julio 2014

Antaŭ la Universala Kongreso en Argentino okazis en la urugvaja ĉefurbo Montevideo la 47-a ILEI-konferenco. La eventon ĉeestis 75 geesperantistoj el 26 landoj. ILEI-konferencoj kutime komenciĝas per franda vespero. Ĉiu partoprenanto alportas ion el sia lando por gustumigi la aliajn. Kolektiĝis multe da frandaĵoj kaj babilante la homoj interkonatiĝis.

La solena inaŭguro okazis en la impona konstruaĵo de la Nacia Parlatento. La inaŭguron ĉeestis la urbestro s-ino Ana Olivera kaj du reprezentantoj de la regiona oficejo de Unesko en Montevideo, inter kiuj estis la

direktorino s-ino Lidia Brito. La ĉeestantojn bonvenigis s-ino Mireille Grosjean el Svislando, la prezidantino de ILEI. Ankaŭ la urbestro kore bonvenigis nin kaj deziris al ni sukcesan laboron. Same



bonvenigajn vortojn direktis al ni la direktorino de la Unesko-oficejo. Poste parolis la vicprezidanto de UEA Stefan MacGill kaj sekvis du mallongaj prelegoj rilataj al eventoj antaŭ 60 jaroj. En la sama loko la Ĝenerala Konferenco de Unesko aprobis la unuan rezolucion favoran al Esperanto en la jaro 1954. Por ni tio estis vere grandioza kaj digna evento povi esti en tiu tiom signifoplena historia loko dank' al la klopodoj kaj sukceso de lokaj esperantistoj sub gvido de Sonia Risso. Poste ni havis eblon viziti sub gvidado la parlamentejon kaj kunvenejojn de deputitoj kaj senatanoj. Impresis nin la ampleksa biblioteko. Forlasinte la parlamentejon ni en la apudeco sur herbejo plantis gujavan arbeton. Ĉiu aldonis al ĝi iom da tero aŭ akvumis ĝin. Apud ĝi estis malvualita memortabulo kun la jena teksto: Esperanto – Unesko, 60 jarojn kune 1954-2014.

La konferencaj prelegoj okazis en la Ateneo ĉe la placo “Cagancha”. Sur ŝtofo estis prezentita la markemblemo de ILEI. S-ro Alberto Barrocas ricevis de urugvajaj esperantistoj enkadrigitan diplomon pro sia 60-jara laboro por Esperanto. La konferencanoj eksciis pri instruado laŭ Tinĉjo-libro, oni parolis pri nuntempaj tendencoj en la lingvoinstruado kun aparta atento al la rolo de teknologio, pri kultura komunikado, pri la projekto “Ceibal” - havigo de malgrandaj komputiloj por ĉiuj lernejoj por plifaciligi la lernadon ankaŭ por gepatroj, pri afrika influo en muziko kaj kulturo.

La komitato de ILEI elektis du novajn honorajn membrojn – s-ron Rob Moerbeek, kiu ĉeestis la konferencon kaj la forpasintan profesoron Helmar Frank. Krome estis elektitaj kvar novaj landaj sekcioj en Irano, Hispanio, la Demokratia Respubliko Kongo kaj Bulgario. Oni decidis aperigi la revuon JUNA AMIKO kvarfoje jare.

La konferencon partoprenis ankaŭ la prezidanto de UEA Mark Fettes. La simpozio en Montevideo esploris lingvan justecon en la praktiko. Okazis serio da interesaj prelegoj: pri indiĝenaj popoloj, pri dulingveco, Esperanto kaj medicino, lingva justeco en Eŭropo kaj multlingveco en Eŭropa Unio, Rob Moerbeek dum la paŭzo ekzemplis erarologion kaj la simpozio finiĝis per prezento de rektmetoda kurso en interreto SALUTON!

Dum la nacia vespero ni ekkonis la historion de la Ĉarua etno kaj spektis prezenton de folkloro danco, kantojn prezentitajn de infanoj kaj ne mankis

tangoprezento. Ankaŭ niaj talentuloj kontribuis al la posta internacia vespero kaj prezentis dancojn, spritaĵojn, deklamis poemojn, gitar- kaj pianludis, kantis. Bonega estis la bankedo en la restoracio “El Fogón” en akompano de muzika duopo. Per duetaĝa turisma buso ni traveturis la urbon kun surbendigitaj E-klarigoj ĉe ĉiu interesa punkto.



Malgraŭ la pluva vetero ni ĝuis belan ekskurson al “Punta del Este”. Tie ni admiris marvirinetojn, finprojn elstarantajn

el sablo (monumento fare de la ĉiliano Mario Irarrázabal), kie ni fotiĝis man-en-mane. Tre interesa konstruaĵo “Casapueblo” situanta en “Punta Ballena” estas muzeo de Carlos Páez Villaró. Tie oni povas admiri liajn artaĵojn.

Atenton elvokis multaj homoj promenantaj surstrate kun termoboteloj, mateoj kun suĉiloj kaj ĉiumomente trinkantaj la mateon. Ĝi estas la plej populara nacia trinkaĵo en Urugvajo. Oni povis spekti ankaŭ vesperajn tango-dancantojn apud la ĉefstrato. Ĉiu, kiu deziris kaj scipovis, havis eblon enviciĝi kaj kundanci.

Tre interesa estis lingva festivalo antaŭ la Ateneo ĉe la frekventata strato. Ni prezentis 16 lingvojn kaj disdonis varbilojn pri Esperanto. Kelkaj preterpasantoj kaptis la okazon kaj scivoleme sekvis duonhorajn lecionojn. La plej grandan atenton vekis la japana kaj nepala lingvoj.

Vendrede la plejmulto de la konferencanoj karavane busveturis al “Colonia de Sacramento”, kie ili vizitis la pitoreskan urbeton, enskribitan en la listo de mondaj heredaĵoj de Unesko, kaj poste daŭrigis per ŝipo al Bonaero. Dum la semajno ni havis buntan programon kaj ĉiuj bone amikiĝis kaj amuziĝis dum la paŭzoj. Koran dankon al la urugvajaj samideanoj, kiuj strebis al bona disvolviĝo de la konferenco en tiu ĉi signifoplena jubilea jaro inter Esperanto kaj Unesko pro la 60-a jariĝo de la unua Rezolucio.

Moralan subtenon al la konferenco esprimis ankaŭ la urugvaj prezidento Don José Mujica.

Liba Gabalda

La 99-a Universala Kongreso en Bonaero

26.7. - 2.8. 2014

La 99-a Universala Kongreso de Esperanto okazis en Argentino. Ĝi estas la dua plej granda ŝtato de Suda Ameriko. Ĝiaj najbaraj landoj estas Ĉilio, Bolivio, Paragvajo, Brazilo kaj Urugvajo. Oriente ĝiajn bordojn banas Atlantika Oceano. La ĉefurbo Bonaero havas humidan subtropikan klimaton. La lando havas pli ol 40 milionojn da loĝantoj. En Bonaero vivas 3 milionoj el ili, sed kun la ĉirkaŭaĵo ĝi atingas preskaŭ 13 milionojn da enloĝantoj. Ĝi estas ĥaosa urbego pulsanta tage kaj nokte.



Kiel en ĉiu grandega urbo la loĝantaro ne facile vivas tie. Meze de bruega amaso regas malsekureco. Malbono okazis al pluraj esperantistoj. Ili estis priŝtelitaj kaj eĉ per armil-minaco iu estis devigata fordoni siajn valoraĵojn.

Argentino unufoje gastigis la UK-on, al kiu enskribiĝis 706 geesperantistoj el 57 landoj. La evento plejparte okazis en la urbocentro de Bonaero en la hotelo Panamericano, proksime

al Obelisko. La malfermo, la fermo kaj ĉiuj vesperaj kulturaj programeroj okazis en Teatro Metropolitan. Kiel kutime sabate vespere okazis la tradicia Movada Foiro, kie diversaj esperantistaj organizoj kaj asocioj informis pri sia ekzisto, prezentis siajn estontajn aranĝojn kaj varbis novajn anojn.

Dimanĉe la 27-an de julio inaŭguriĝis la 99-a UK per festparolado de la prezidanto de UEA Mark Fettes. La ceremonion ĉeestis ankaŭ kelkaj honoraj gastoj kaj ambasadoroj. Speciala gasto estis Roselyne Dewilde, praparenino de L.L. Zamenhof loĝanta en Argentino. Salutparolis subsekretario de la urba ministerio pri edukado, la prezidanto de LKK Jorge Cabrera, estis legita la mesaĝo de L.C. Zaleski Zamenhof. Poste salutis la kongreson la reprezentantoj de la partoprenantaj landoj. Ĉe la fino estis kantata la E-himno kaj post tio la kongreso estis malfermita.

La ĉeftemo de la kongreso estis: "Ĉu la nepoj nin benos? Streboj al daŭripova estonteco". Ĝi estis amplekse pritraktata en grandnombre ĉeestataj prelegoj kaj diskutoj. La

bunta semajna programo havis kunvenojn de esperantistaj medicinistoj, instruistoj, komercistoj, sciencistoj, kristanoj kaj aliaj religiuloj, nefumantoj, blinduloj, SAT-



anoj kaj aliaj asocioj. Okazis kurso pri la hispana lingvo, pri tango-danco, pri kaligrafio kaj pluraj prelegoj pri Argentino. Gejunuloj havis sian programon. Tre aprezataj kaj frekventataj estis la paroligaj lecionoj gvidataj de Katalin Kováts kaj Sylvain Lelarge. Ili en amuza formo prezentis kursojn por komencantoj kaj spertigis progresantojn. Estis eblo partopreni en KER-ekzamenoj, al kiuj kandidatiĝis 30 personoj. Esperantlingvaj aŭtoroj prezentis siajn verkojn dum la aŭtoraj duonhoroj en la libroservo.

La nova estraro sub la gvido de la vigla kaj entuziasma prezidanto Mark Fettes alportis plurajn ŝanĝojn al la kongresa programo. La tagoj de la semajno ricevis novajn nomojn bazitajn sur la ĉefaj punktoj de la laborplano: lundo estis la Tago de konsciiĝo, Tago de la lernejo iĝis la Tago de kapablo, ĵaŭdo estis la Tago de komunumo kaj vendredo la Tago de kunordigo.

Same kiel lastjare en Rejkjaviko, ankaŭ ĉi-jare la 27-an de julio posttagmeze okazis la Ĉina Tago en la apuda hotelo Colon. Oni povis admiri belegan foto-ekspozicion pri Pekino, ekscii pri la Esperanto-muzeo kaj pri la E-movado en Azio. La ĝenerala direktoro de UEA Osmo Buller ricevis de ĉinaj reprezentantoj Premion de kontribuo al Esperanto-Amikeco kaj la dokumentan filmon LONGA RIVERO.

Nova elemento eniris la kongreson. Kelkaj sportemuloj ĝuis historian futbalmatĉon inter esperantista teamo formita surloke kontraŭ armen-devena teamo. La entuziasmo estis granda malgraŭ tio, ke la esperantistoj malgaj-

nis. Eble tio fariĝos nova kongresa tradicio. Tamen mankis alternativa programo por nesportemuloj. Bedaŭrinde oni ne pensis pri vespera tango-spektaklo. En la urbo tiuj abundis. Efektive, en la kongresa programo estis io por ĉiu. Multaj kongresanoj profitis urbajn ekskursojn por malkovri ĝiajn belaĵojn kaj historiaĵojn. Per duetaĝa turisma buso eblis trairi la urbon kaj dum pli ol tri horoj admiri multajn interesajn vidindaĵojn. En la urbo troviĝas multaj muzeoj, galerioj, parkoj, ripozejoj. Tute speciala estas la kvartalo "La Boca" kun interesa arkitekturo kaj la fama buntkolora farbita strato "Caminito". Unu semajno ne sufiĉas por vidi ĉion vidindan kaj ĝui ĉion ĝuindan en tiu ĉi urbego. Tamen oni povas diri, ke la kongreso estis kontentiga, eĉ se malgranda. Ĉu la homoj rezignis la kongreson pro la longa distanco, ĉu pro tro alta kosto, ĉu pro la vintra sezono en Argentino, ĉu pro ŝparo por povi partopreni la jubilean 100-an kongreson en Lillo? La plej multaj kongresanoj venis el Brazilo, Japanio kaj Francio. Bonŝance partoprenis pluraj junaj sudamerikanoj. Por iuj ĝi estis la unua kongreso. Ili estis tre kontentaj kaj entuziasmaj pri tiu sperto. La partoprenantoj ĝuis la urbon, ekskursojn, manĝojn kaj pasigis la tempon kun novaj kaj malnovaj geamikoj. Laŭ la lastjara kutimo la estraranoj post la fino de la kongreso adiaŭis la partoprenantojn per manpremo.


Liba Gabalda

Doktora disertacio pri "Ĵurnalismo de la E-movado"

La 25-an de septembro 2014 Dmitrij Vlasov sukcese defendis doktoran disertacion kun la temo "Ĵurnalismo de Esperanto-movado en XX-a jarcento: tendencoj de evoluo kaj tipologiaj specialaĵoj". Ĉi jare la eldonejo Impeto eldonis lian monografion, kiu estas bazita sur lia disertacio:

http://lernolibro.ru/istorija_esperanto_vlasov

Dmitrij VLASOV naskiĝis en 1987, akiris fakajn sciojn en la geologia fakultato kaj magistran rangon de la ĵurnalista fakultato de la Sankt-Peterburga ŝtata universitato.



Dum la studado li konatiĝis kun Esperanto kaj ekinteresiĝis pri ĝia praktika uzo en amaskomunikiloj. Studis la historion de la rusia esperantismo. En 2011 li defendis magistran disertacion pri la temo “Evoluo de la E-movado kaj ĝia ĵurnalistiko sub cenzuro en la Rusia imperio kaj USSR (1887–1938)”.

- <http://www.impeto.trovu.com/libroj/vlasov2>

- <http://www.impeto.trovu.com/autoroj/vlasov> Lingvo-Studio, L.S.

www.eventoj.hu

Esperanto sonas ankaŭ en la Domo de pensiuloj



Jam la duan jaron mi vivas en la Domo inter oldaj homoj. De tempo al tempo mi ricevas ankaŭ E-korespondaĵon, leterojn el eksterlando kun diversaj poŝtmarkoj eĉ glumarkoj. Miaj kunloĝantoj estis scivolemaj kaj demandis min, kio estas Esperanto. Ilia interesiĝo ĝojigis min kaj mi klopodis al ili klarigi ĉion pri la internacia lingvo,

kion mi ankoraŭ memoris. Ja mi uzadis Esperanton por interkonatiĝo kun eksterlandanoj, kiuj ofte vizitis nin.

Inter niaj aktivaĵoj en la Domo apartenas eĉ taga gimnastiko por movi nian korpon. Nia gvidanta trejnistino diris, ke ni ŝanĝos krion el la ĉeĥa lingvo al Esperanto. Jen: "unu, du, mia ŝu, tri kvar kvin, serĉu nin"!

Tiel vivas Esperanto ankaŭ en la Domo de pensiuloj en la urbo Česká Třebová.

Anna Pištorová, DD Č.Třebová – Bezděkov 918.

Skribu en la kalendaron por la venonta jaro :

En Nitra (Slovakio) okazos inter la 8-a kaj la 15-a de aŭgusto 2015 SAT kongreso. Mi esperas, ke baldaŭ mi povos vin informi pli detale.

SAT-peranto por Ĉeĥio Václav Stibůrek

Al la 100-a Universala Kongreso en la franca urbo Lille organizas nia AEH busvojaĝon kun ekskursoj, ke ni povu ekkoni malproksimajn regionojn. Al Nitra povas vojaĝi ĉiu mem, tien AEH busvojaĝon ne organizos.

red.

150-a naskiĝdatreveno

de MUD-ro Stanislav Schulhof, homo tre talentita, escepte ambicia, dentkuracisto, filantropo kaj patrioto. Li fondis la Esperanto-klubon en Pardubice en la jaro 1909. Stanislav naskiĝis la 12-an de novembro 1864 en la malgranda vilaĝo Lipka ĉe Trhová Kamenice. Li havis 9 gefratojn.

La familio transloĝiĝis al Usono, sed lasis hejme la du plej aĝajn filojn. Leopold ebligis al sia frato Stanislav studi en altlernejo, nome ĝeneralan medicinon. Stanislav sukcese diplomiĝis ĉe la kuracista fakultato. Li poste transiris al la denta specialigo kaj post kelkaj provaj lokoj li venis al Pardubice jam kiel dentkuracisto. Stanislav konis ses lingvojn. Li estis aganta ankaŭ kiel ĵurnalisto, teatra artisto, redaktoro, verkisto kaj poeto.

Li enskribiĝis en la historion de la monda E-literaturo kiel la unua lirika poeto per siaj tri kolektoj kaj tradukis Esperanten versojn de niaj signifaj poetoj. La vico de liaj pluaj verkoj ne konserviĝis, lia domo estis detruita per bombo. Li mortis en la jaro 1919 kaj lia tombo troviĝas en la juda tombejo de Pardubice.

Jarmila Rýznarová

INFORMILO – monata gazeto por esperantistoj-handikapuloj + suplemento **ANTAŬEN**

Eldonas AEH – Asocio de esperantistoj-handikapuloj

Redaktoroj: J. Kosnar, J. Rýznarová, L. Srbová

Adreso: Svaz zdravotně postižených esperantistů, Na Okrouhlíku 953/21,

530 03 PARDUBICE, CZ tel. **466 611 941**

e-mail: aeh@esperanto-ach.eu interreto: www.esperanto-ach.eu

Bankovní spojení: Poštovní spořitelna, číslo účtu AEH **192150088**, kód banky **0300**

Při platbách vždy uveďte vaše členské číslo (nad vaší adresou) jako variabilní symbol!

Roční předplatné časopisu Informilo = 200,-Kč, příspěvek svazu dobrovolný.

La jarabono de Informilo 15 €. Kodoĉe UEA: aehk-z

La redakcio ne ĉiam havas la saman opinion kiel la aŭtoroj de la artikoloj.